



Borgarstjórn

Borgarstjórnarkosningar 26. maí 2018 - framlagning kjörskrár

Hér með sendist borgarstjórn til staðfestingar kjörskrá vegna borgarstjórnarkosninga 26. maí 2018 í samræmi við ákvæði 7. gr. 1. nr. 5/1998 um kosningar til sveitarstjórna. Kjörskráin mun liggja frammi í Ráðhúsi Reykjavíkur frá og með 15. maí fram á kjördag og verður einnig birt á netinu eins og í undangengnum kosningum. Á kjörskrá eru við framlagningu 90.135 kjósendur.

Helga Björk Laxdal
skrifstofustjóri borgarstjórnar

Hjálagt:
Bréf Þjóðskrár Íslands um meðferð kjörskrárstofna dags. 6. maí 2018

Til sveitarstjórna á Íslandi

Reykjavík, 6. maí 2018

Tilvísun ÞÍ: 2017100492/4.5

Meðferð kjörskrárstofna vegna kosninga til sveitarstjórna 26. maí 2018

Með bréfi þessu berast sveitarstjórnnum 3 eintök af kjörskrárstofni vegna kosninga til sveitarstjórna sem fara fram 26. maí n.k. Um sveitarstjórnarkosningar gilda ákvæði laga um kosningar til sveitarstjórna nr. 5/1998. Um framkvæmd utankjörfundaratkvæðagreiðslu gilda lög um kosningar til Alþingis nr. 24/2000.

I. Kjörskrárstofnar og kosningaréttur

Kjörskrá er gerð samkvæmt 2. gr. laga um kosningar til sveitarstjórna og eiga allir þeir kosningarétt til sveitarstjórna sem fullnægja eftirfarandi skilyrðum:

- Eru íslenskir ríkisborgarar.
- Eru 18 ára þegar kosning fer fram.
- Eru skráðir með lögheimili í viðkomandi sveitarfélagi þremur vikum fyrir kjördag, 5. maí 2018.

Á kjörskrá eru einnig danskir, finnskir, norskir og sænskir ríkisborgarar sem átt hafa lögheimili hér á landi í þrjú ár samfelld fyrir kjördag og aðrir erlendir ríkisborgarar sem átt hafa lögheimili hér á landi í fimm ár samfelld fyrir kjördag, enda fullnægi þeir að öðru leyti framangreindum skilyrðum.

Íslenskir ríkisborgarar sem stunda nám á hinum Norðurlöndunum sem þurft hafa að flytja lögheimili sitt þangað vegna ákvæða samnings Norðurlandanna um almannaskráningu, glata ekki kosningarétti sínum. Þjóðskrá Íslands hefur breytt fyrirkomulagi vegna skráningar námsmanna á Norðurlöndunum á kjörskrá. Námsmenn á Norðurlöndunum þurfa nú að tilkynna það rafrænt til Þjóðskrár Íslands að þeir séu námsmenn til þess að verða teknir á kjörskrá fyrir sveitarstjórnarkosningarnar, sbr. kynningarbréf Þjóðskrár Íslands til sveitarfélaga dagssett 7. febrúar s.l.

II. Kjörskrárstofnar, sbr. 4. – 9. gr. laga nr. 5/1998

Sveitarstjórnir sjá um að kjörskrár séu gerðar en Þjóðskrá Íslands gefur út prentútgáfu kjörskrárstofna til afnota fyrir sveitarstjórnir. Á hverri blaðsíðu koma fram upplýsingar um heiti sveitarfélags, kjörstað og kjördeild (hafi þær upplýsingar verið skráðar í kjördeildarkerfinu), auk blaðsíðunúmers innan sveitarfélags og raðnúmers kjósanda. Skjaldarmerki Íslands er staðsett efst í hægri horni hvers blaðsíðu og er svartlitað, gráir rastar afmarka leslínur og heimilisföng eru feitletruð.

Á kjörskrárstofni eru eftirtaldar upplýsingar um kjósendur skráðar:

- nafn,
- lögheimili,
- kyn
- kennitala
- ríkisfang ef það er ekki íslenskt.

Hægra megin við kennitölu kjósanda eru tveir dálkar, þar sem setja skal krossmerki er kjósendur neyta atkvæðisréttar á kjördegi. Skulu krossmerki við nöfn karla sett í dálkinn með fyrirsögninni “Ka”, en krossmerki við nöfn kvenna í dálkinn með fyrirsögninni “Ko”. Á þetta að auðvelda talningu karl- og kvenkjósanda, en þeir skulu gefnir upp, hvor í sínu lagi, í skýrslu þeirri, sem hver undirkjörstjórn gerir um kosninguna. Í dálkinn með fyrirsögninni „Erl.“ er ríkisfang kjósanda forskráð ef það er annað en íslenskt.

Hafi sveitarfélag notað kjördeildakerfi Þjóðskrár Íslands við röðun heimilisfanga í kjördeildir og kjörstaði, þá prentast kjörskráin eftir þeirri röð. Þannig er fremst að finna kjörstað nr. 1 og tilheyrandi kjördeildir, því næst kjörstað nr. 2 og kjördeildir tilheyrandi þeim kjörstað og svo koll af kolli. Hafi sveitarfélag ekki notað kjördeildakerfið raðast kjörskráin eftir stafrófsröð götu- eða bæjarheitis.

III. Leiðrétting sveitarstjórnar á kjörskrá, sbr. 10. og 11. gr. laga nr. 5/1998

Kjörskrárstofnar miðast við skráningu lögheimilis í sveitarfélagi eins og það er samkvæmt íbúaskrá þjóðskrár þremur vikum fyrir kjördag, þann 5. maí 2018. Óheimilt er að breyta kjörskrá ef tilkynning um nýtt lögheimili hefur ekki borist Þjóðskrá Íslands fyrir þann tíma.

Sveitarstjórnir sjá um að leiðrétta kjörskrárstofna eftir því sem tilefni er til. Helstu ástæður sem geta leitt til breytinga á kjörskrá samkvæmt þessu eru öflun eða missir ríkisfangs, andlát einstaklings, mistök við skráningu lögheimilis einstaklings eða því um líkt. Sveitarstjórn skal þegar taka til meðferðar athugasemdir er henni berast vegna kjörskrár og gera viðeigandi leiðréttingar á henni. Leiðréttingu má gera fram á kjördag, en óheimilt er að gera breytingar ef tilkynning um lögheimili hefur ekki borist Þjóðskrá Íslands í tæka tíð fyrir viðmiðunardag 5. maí 2018. Þannig skal ekki gera breytingar á skránni hafi einstaklingur flust til innan sveitarfélags eða milli sveitarfélaga eftir þann dag.

Sveitarstjórn skal einnig fram á kjördag leiðrétta kjörskrá ef henni berst vitneskja um andlát eða um að einhver hafi öðlast, eða eftir atvikum misst íslenskt ríkisfang hafi viðkomandi ekki öðlast kosningarétt skv. 2. gr. laga um kosningar til sveitarstjórna. Þjóðskrá Íslands mun senda sveitarfélögunum slíkar upplýsingar er berast stofnuninni til skráningar á tímabilinu frá viðmiðunardegi fram að kosningum.

Leiðrétti sveitarstjórn kjörskrá, samkvæmt 10. gr. laga um kosningar til sveitarstjórna skal hún þegar tilkynna það hlutaðeigandi, svo og sveitarstjórn er mál getur varðað,



sbr. 11. gr. laganna. Jafnframt skal tilkynna hlutaðeigandi kjörstjórn um leiðréttingu á kjörskrá.

a) Niðurfelling einstaklinga af skránni

Sveitarstjórn skal strika með bleki yfir línu (nafn og persónuupplýsingar) þeirra sem hún fellir af kjörskrá vegna leiðréttingar, og um leið gefa til kynna með skammstöfun framan við hlutaðeigandi nafn, hver sé ástæða útstrikunar. Útstrikunum og skammstöfun þeirra skal haga sem hér segir:

1. Skammstöfun: “**†**” (krossmerki): Einstaklingur á skránni er látinn.
2. Skammstöfun: “**e. ísl.**”: Einstaklingur á skránni er ekki ísl. ríkisborgari. Viðkomandi ranglega talinn íslenskur ríkisborgari á skránni, enda sé ekki um að ræða erlendan ríkisborgara með kosningarétt.
3. Skammstöfun: “**mist.**”: Mistök við samningu kjörskrár.

b) Einstaklingar sem bætast á skrána

Einstaklingar sem bætast á skrána vegna leiðréttingar, ritast á milli lína meðal íbúa viðkomandi húss. Skal á þeim stað í kjörskránni, þar sem kjósandi ætti að vera, rita aftan við hlutaðeigandi heimilisfang: „*sjá viðb.*“ Ekki er gert ráð fyrir að sérstök viðbótareyðublöð þurfi til leiðréttinga.

IV. Framlagning kjörskrár

Þegar sveitarstjórn hefur lokið yfirferð sinni um kjörskrárstofninn og samningu kjörskrár er þar með lokið, skal hún undirrituð í samræmi við 7. gr. laga nr. 5/1998, þ.e. af oddvita sveitarstjórnar eða framkvæmdastjóra hennar.


Kjörskráin skal liggja frammi almenningi til sýnis í 10 daga fyrir kjördag, frá 16. maí 2018, sbr. 9. gr. laga nr. 5/1998. Nægilegt er að staðfest endurrit sé lagt fram, sbr. 3. mgr. sömu greinar.

V. Annað

Öll kjörskráreintök, sem tekin eru í notkun, skulu fá sömu meðferð að því er varðar leiðréttingar og áritanir.

Ef sveitarstjórn þarf á fleiri en 3 kjörskráreintökum að halda, skal hún snúa sér til Þjóðskrár Íslands.

F.h. Þjóðskrár Íslands


Arný Guðrún Ólafsdóttir
Sérfræðingur

Afrit:

Sent öllum sveitarstjórnnum